

FELIBRIGE

La Santo-Estello de Mendo sagatado pèr lou long counfinamen...



Prouvènço d'aro

Tóuti li mes, lou journau de la Prouvènço d'aro

Mai de 2020

n° 365

2,10 €

Felibrige

Emai i'aguèsse pas de canounado, poudèn vuei reprene uno crounico felibrenco dóu tèms de guerro :

"Aurès remarca la peno qu'avèn tóuti pèr espremi noste malastre e li crudèu pensamen que nous ispirò. Cadun, davans la Franço matrassado, rèsto mut o cerco li mot que d'autri an di, tèms passa, dins un malur parié, dins un pariero angouisso..."

E Frederi Mistral, soute l'escai-noum bèn couneigu de Gui de Mount-Pavoun èro pas en rèsto :

"Vesès, fau jamai se maucoura. La Franço es trop amado, trop grandamen astrado, trop generoso e luminoso pèr que l'umanita se posque passa d'elo, e pèr que soun angouisso siegue outro causo qu'uno esprovo. Esperen dounc e aguen fisanço!"

Urousamen li felibre èron toujours fisançous dins l'aveni :

"Un mounde novèu! Ço qu'èro neblous aièr devèn vuei uno clarta. Lou dangié coumun refourtis li liame de famiho, e li pople latin se rejougnon en un freirenau poutoun."

"Au mitan dis evenimen que tóuti nous treboulon, — mai nous discourajon pas, au countrari, — l'obro felibrenco plan-plan se perseguis."

E un cop vincu lou mau :

"Basto! ço que i'a de-segur, es que, nous acamparen l'an que vèn, pèr la Santo-Estello de la Vitòri..."

Au mes de mai d'aquest an, la pandèmia sara pas acabado, l'escoubihage dóu mau vai plan-planet, tóuti lis acamp, reünion, rassemblamen, passo-carriero, manifestacion, ceremonié, counmemouresoun, festenau vo fèsto prouvençalo cabusson parieramen, plan-planet. D'uni d'aquélis acampado se podon pas remanda, quand la dato es passado, es passado, se pòu pas ana de-reculoun !

Pèr d'autris evenimen d'aquelo menò n'i'a que se podon remena e tourna faire un pau mai tard. Tant soulamen es la couneissènço de l'estirado de tèms necito que manco pèr se senti li quatre pèd blanc e se desembarra de-bon... Se tambourino que la liberta coundicionalo sara acourdado lou dilun 11 de mai 2020 en aquéli que saran proun gaiard e encaro jouine... pèr lou restant, vai-ten saupre !

Pas de Santo-Estello 2020



Sènso agué ausi canta la mandragouro, coume se dis, es deja à saupre que li vièi coume Adam, lis ancian coume li bàrri, lis aujòu coume paterno, li majour coume Erode, li segne-grand coume de roure, saran toujours en penitènci enjus-qu'à-n-uno uno outro dato renouvelablo ! Segur lou prouvèrbi pòu pas menti :

*Vièi e jouvènt
Van gaire ensèn.*

E belèu que mai à l'ouro d'aro :

Vieïesso malautié de naturo.

En bon darnié :

*Es grandò sagesso
D'espargna la vieïesso.*

De-bon verai, ié sara espargna de sourti lou 11 de mai que vèn. Santo Patiènci ! Ansin pèr tant long-tèms que durèsse mai, noubrous saran aquéli que poudran pas participa à de rescontre que li pertocou d'en proumié. Bèu proumié lou coungrès annau de la Santo-Estello. Emai i'aguèsse encaro forço jouine dins lou Felibrige, es de tradicion que li gouvèrnaire de la soucieta mistralenco se faguèsson dins l'age, e atrivèsson forço gènt de soun tèms dins sis acamp. Adounc la Santo-Estello d'aquest an, au mes de mai 2020, s'avié d'èstre, riscavo que perdre forço mounde. Pèr acò, coume n'avisè lou Capoulié, Jaque Mouttet, en resoun de la situacion sanitàri dóu país, s'es decida de-coutrio emé lou Maire de Mendo, la viloto ounte se devié teni aquest an,

la Santo-Estello se farié pas coume previst dóu 29 de mai au 2 de jun 2020. Mai, lou Felibrige espandira pamens un message sant-estelen lou dilun de Pandecousto.

Dins l'istòri dóu Felibrige lou cas fourça se pausè qu'un desenau de cop dins li circoustànci doulourouso di dos guerros, de la revòuto estudiantino de mai 68, e vuei pèr l'encauso de nòsto epidèmia que bat toujours l'antifo.

Coume se fagué à chascun cop, lis istànci dóu Felibrige coume lou Counsistòri, s'acamparan quouro sara poussible.

De tout biais, s'es anouncia que la Santo-Estello, remandado, se tendrié à Mendo en 2021 e aquelo d'après previst pèr Arle en 2022.

B. G.

Languimen en counfinamen

Resta embarra, fai de tèms que se dis "counfina" en lengo nostro.

Pajo 2

Anima un cous en prouvençau

Vaqui uno bono metodo pèr aprene la lengo prouvençalo...

Pajo 3

La vido es uno vis sènso fin...

Lou tèms es vengu de s'ocupar de la malautié dóu covid-19...

Pajo 6